

28/08/1997

Antara pengisian dan perayaan

Azizi Suratman

AKHIR bulan ini, genaplah 40 tahun kita merdeka. Masa berlalu begitu pantas. Angin perubahan semakin deras. Sekarang, bumi yang diinjak ini milik bangsa kita. Kita waris sejati. Bumi yang diinjak ini dibina dan disirami dengan air mata. Dengan semangat yang kental. Tiang prinsip dan idealisme perjuangan yang pejal, yang tidak boleh dijual beli. Itulah azimat dan bekal amalan perjuangan luhur dan kejayaan bangsa kita.

Tanpa ini semua, kita tidak akan jadi sebagaimana hari ini. Kalau bumi yang disegar-suburkan dengan air mata pengorbanan ini dipersia-siakan dan tidak dihargai oleh anak-anak bangsa maka hancurlah segala harapan dan hasrat murni menatap kebangkitan bangsa maju dan berjaya.

Kalau kita masih ingat beberapa bait puisi yang dideklamasikan oleh Datuk Seri Dr Mahathir Mohamad pada Malam Puisi Utusan IV, 4 Mei 1996 tahun lalu, di Pusat Penerangan Pelancongan Malaysia (Matic), kita dapat rasakan visi, renungan yang bersifat futuristiknya, tanggapan terhadap pengisian dan kedaulatan bangsa, agama dan negara.